



道園學古錄卷之二十一

應制錄一

雍虞集伯生

冊文

皇后祔廟冊文

伏以進承大統奉宗廟以無私升侑闕宮在邦家而有制永言徽懿宜極尊崇

英宗皇后卷吉刺氏懿德

英皇相時至治作新禮樂親



孝祀之苾芬揔覈權綱成化功之簡易宣資中助丕顯前聞故周南詠輔佐之勤坤道著順承之美鼎湖夕逝感霜露之悃身椒掖晨空驚歲時之即遠乃修經典式替嘉稱謹遣攝太尉某官臣某奉玉冊玉寶上尊號曰莊靜懿聖皇后升祔英宗廟室伏惟濯赫有靈陟降在上歆于大饗於萬斯年

皇后冊寶文

皇帝若曰朕祇服祖宗之成訓式嚴統緒之正傳躬荷洪休勉登大寶揆乾坤之定位觀日月之合明乃瞻壺闈率宗稱號皇后卷吉刺氏專靜謙抑懿柔淑嘉世有令儀來相宗事肆朕舊勞於遠外兼夙夜以憂勤暨予力濟於艱難亦後先而輔佐若昔朝廷之體循茲典禮之常官府具宜家邦興讓今遣攝太尉某官某持節授爾玉冊寶章以陰教乎內備協人文以順承乎天永寧地道噫生民之詩作不忘厥初閔睢之化行庶幾有助尚紱景命克配無疆

明宗皇帝祔廟冊文

臣聞統必有宗生嘗得以致其讓廟必有主沒思所以尊其名稽古考文且天錫誅欽惟先皇帝夙秉勇智惟時元良體傳次之成言遊謳歌而逸出

雖身居絕域多歷於歲年而義動遠人樂為之先後德威孔著未堪大業之艱貞事變匪常猶閔生靈而慎動庶來蘇於僕戴爰戡定以奉迎已謹清宮俄虛黃屋臣民寡祐求遺惠澤之敷施天日有臨尚想神明之如在禮嚴升祔誠備顯揚謹遣攝太尉某官某奉玉冊玉寶上尊謚曰翼獻景孝皇帝廟號

皇太后冊文

嗣皇帝臣御名謹稽首再拜言曰臣惟祖宗積累之勤奄有方夏先皇仁讓之至全付眇冲奉神器以持盈仰慈恩而思報欽惟皇后陛下德齊睿聖躬濟艱虞相協成功著坤儀於天下彌綸大造凝鼎命於禁中爰尊太母之鴻名祇若我家之盛典式隆孝養保祐方來謹奉玉冊玉寶上尊號曰

皇太后伏願上帝昭融眷我 皇國於萬斯年介以景福永
言思齊祚胤千億臣 舞名誠歡誠抃稽首再拜謹言

明宗皇帝升祔樂章

猗那皇明世續神武敬天弗違時潛時拔龍旂在塗言受率
土不遐有臨永錫多嘏

策問

會試策問

傳曰春秋教以禮樂冬夏教以詩書若稽古昔率是道也吾
夫子修禮正樂刪詩定書贊周易作春秋天下萬世賴焉漢
立學官經制博士名家之學史具可攷歷唐以來定為註疏
立教者用之 國家設科取經術之士今十餘年矣廓而明
之不在學者乎夫自漢唐至于近代說經者多矣或傳或否
悉論焉則累日不能既其目請以耳目所共及者而問焉易

自王輔嗣之說行而言象數者隱其有存者猶當攷夫邵子
先天之學可得而傳乎程子之傳朱子之本義旨意所指文
義所當有異同乎書有今文古文之辨傳者終不敢折而為
二以昔人成書有未可輕意者乎詩自毛傳盛行韓傳僅見
迨朱氏傳出一迺其故其有所授乎毛鄭舊說猶有可論者
乎春秋左氏公穀之傳與經並行久矣至于啖趙陸氏始辨
其不合而求諸經君子躓之三子之說果盡得聖人之旨乎
劉氏權衡三傳益密于陸而劉傳果無餘蘊乎胡氏之說其
立義得無有當論者乎禮有儀禮及大小戴記又有周官小
戴記今用之儀禮其經也可忽講乎大戴之記猶有可取者
乎周官之制可互攷乎鄭氏之註其歸一乎此罔諸君子積
習而素知者其詳言之

會試策問

昔者神禹盡力溝洫制其畜洩導止之方以備水旱之虞者其功尚矣然其因其利而利之者代各有入故鄭渠鑿而秦人富蜀墾成而陸海與漢唐循良之吏所以衣食其民者莫不以行水爲務今畿輔東南河間諸郡地勢下春夏雨霖輒成沮洳閼陝之交土多燥剛不宜於曠河南北平行廣袤旱則千里赤地水溢則無所歸往、上貽宵旰之憂至發 明詔修庶政出粟與幣分行賑貸恩德甚厚然思所以求相民業以稱旨意者豈無其策乎五行之材水居其一善用之則灌漑之利瘠土爲饒不善用之則泛溢填淤湛漬啗食茲欲講究利病使畿輔諸郡歲無墊溺之患而樂耕桑之業其疏通之術何先使閼陝河南北高亢不乾而下田不浸其豬防決引之法何在江淮之交陂塘之跡古有而今廢者何道可復願詳陳之以觀諸君子之奈

廷試策問

洪惟

大祖皇帝受天明命肇興景祚 列聖繼作四征不庭鋒旗攸指靡不率服迨我

世祖皇帝混一區宇戡方所載振古未有於是建國紀元立官府置郡縣制禮樂定貢賦 帝德王功之盛粲然如日星之行天四時之成歲也六七十年之間講之益明治之益習天下晏然守其盈成者又何以加之哉朕繼承正緒夙夜祇懼承我 聖祖神考之心比歲再禩太室仰而思之求盡其道而未能也夫親、莫內于九族今百世本支繁衍盛大則既尊位重祿矣尚有以勸之之道乎尊賢莫先於百姓今世臣大家勲業昭茂則亦既富方穀矣尚有以體之之道乎多方內附之衆因其俗而導之者亦既久矣一而同之之道尚

有可充者乎生聚教養之民因其生而厚之者亦既周矣協而雍之之道尚有可致者乎書曰鑒于先王成憲其永無愆朕之志也子大夫咸以道藝來造于廷其備陳之朕將親覽焉

廷試策問

朕聞伏羲神農黃帝之事見於易堯舜禹湯文武之治存乎書皆聖人也其號名雖殊而治化則一日月星辰之爲天丘陵川澤之爲土君臣父子夫婦長幼之爲人三極之道有以異乎宗廟也朝廷也師旅也禮樂也佃漁也耕桑也時之所尚雖小有損益其爲治之具豈有易於此者乎然而伏羲神農黃帝之所以爲伏羲神農黃帝堯舜禹湯文武之所以爲堯舜禹湯文武可得而別歟伏羲之卦文王申之神禹之疇武王詢之文無異也道無異也然伏羲之作造化備矣何以

有待於文王武王之心神明通矣何以猶待於箕子然則羣聖之與有待於後世者猶無窮乎子大夫習之於師考之於古得之於心宜之於今亦素有其說乎朕誠以爲非伏羲神農黃帝無以爲道非堯舜無以爲德非禹湯文武無以爲功心術之精微制作之會通子大夫其悉陳之朕將親覽焉

詩

題周怡臨韓幹明皇出游圖

開元盛事何人畫玉冠夫容御天馬從官騎步各有持移仗華清意閒暇宮花如錦照青春詔許傳看思古人不知身在瀛洲上親奉圖書侍紫宸

明皇出游圖

輦路風微曉霧開華清宮裏看花來五王乘馬誰先醉倒看宮袍去不回

端午賜大長公主

細葛迎颺喜宮衣之初試瑞蓮承露慶壽華之方持輒陳節
物之多儀用祝年齡之有永併將唐律式衍晉風
殿閣薰風五月涼綠荷池上度天香扇裁團羅羅雪盈注
輕冰瀉玉幾塵尾可消時晝永綵絲宜祝壽年長清朝共慶
宮闈貴萬歲喜蒲泥紫觴

董元夏景山口待渡圖

董元夏山何可得嘉禾千章鐵作畫曾巒總舍雨氣潤百谷
正受川光溢犬牙洲渚善狀迴滄江散落碣石開山田何處
無耕鑿尋源不得還徘徊柳下行人將有通臨流不度心爲
惻我楫孔堅舟孔安奉子以濟諒非難

徽宗畫梨花青禽圖

宿雨初收禁林寂玉斧臨臨看春色疾藜沙上暖塵飛何處

人間作寒食

趙千里小景

前代王孫不好武拈筆幽牕寫汀渚殘雲野水二百年依舊
松筠濕春雨

燕文貴小景

行盡長松逕溪頭有小舟鑑湖如賜與終日弄清流

趙千里出峽圖

巨舟臨峽口衆工志如一各以所操濟雖危萬無失所憂至
平曠玩肆生縱逸母婢持釣翁倚杖三太息

蘊能羅漢圖

有寶其實破慳來獻我乃回施非見所見月輪當空天清海
平神光赫然萬國永寧

白樂天重屏圖

錦屏圍煖坐衰翁，妻子相看語笑同。翡翠鴛鴦元是畫，櫻桃楊柳詎非空。清朝優老容歸早，野寺宜閑見歲豐。堯率有天何異此，葛巾吟偈白蓮風。

陳閱畫中宗射鹿圖

昭陵石馬立殘陽，曾見騰驤逐鹿場。馳射衝波夸獲雉，故知英氣似前王。

羅漢圖

神光炯炯視容直，坐展兩足手按膝。雨龍還入軍持水，風衣拂着磐陀石。深山海島非人間，碧桃花開啼鳥聞。法雲還爲等慈起，巒然飛錫無留難。

韓幹馬

開元沙苑蒺藜秋，韓幹新圖摠不收。天廐真龍奇骨在，故知臣甫負驂騑。

曹霸下槽馬

撥下長年飽豆芻，誰通馬語識踟蹰。主恩深重知何報，或者東封駕鼓車。

韓晉公_滉土星像

猗黃靈墳土中，馴伏牛類相從。朱旂揚招八風，乘天田入紫宮。命司耆錫九農，鳴塊桴年屢豐。

柯博士畫扇

旭日鳴幽鳥，露華在芳藜。外廷無奏事，殿閣自微風。

胡虔取水蕃部圖

駝車度磧輒三日，老馬砲沙泉水溢。橐囊盛酒不辭勞，徼外天山雪千尺。君不見聖明天子恩澤多，旁及四海猶翁河。昆蟲草木感餘潤，日獻醴泉甘露歌。

滕昌祐懷香睡鵝圖

蒼鵝惜毛羽死之卧春雨雨餘日照紗上有穠香花懷香不自獻夢到金鑿殿殿池多躍魚君王方草書

銘

奎章閣銘

天曆三年三月吉日 天子作奎章閣萬機之暇觀書怡神則相御焉臣奉勅而銘之曰

維皇穆清中正無爲翼二其欽聖性日熙廼闢延閣左圖右史匪資燕娛稽古之理經緯有文如日行天爰刻貞玉垂美萬年

棊盤銘

動制勝靜保德勇有功仁無敵

棊盤銘

圓周天方畫地握化機發神智

贊

趙平章畫像贊

臣聞古昔帝王所以加禮於輔相老臣者以爲爵位之崇錫予之厚有不足以盡其心則必象其體貌而致美於形容焉於顯之昂人如圭如璋又曰敬慎威儀惟民之則其此之謂夫公以勲門將胄篤尚儒素積學以致用人莫知其志之所存也出事

世祖皇帝始爲御史風采肅然振厲中外歷事 累朝踐揚臺省垂五十年事業著簡冊勲庸書旂常天下謂之名臣朝廷謂之元老當顯用而憂時愈深嬰患難而立節弥固夷險一致進退以時蓋有古君子之風焉是以論者以爲清嚴似揚綰淵通似李泌周緻似姚崇劉至似陸贄至於以直構禍蹈機筭而不爲之動則漢蕭望之殆不能及噫此天下之公

言非臣之私言也至順元年五月甲子

今上皇帝念翊戴之功俾繪其像而命臣集為之贊臣少嘗從公游今且老矣其實知公故承 詔不辭謹再拜稽首而

獻詩曰

肅之魯公泰山巖之剛毅直方為國之監有言有猷以定國是衆人所難在公則易

世祖舊臣維公在茲百煉之剛遇挫弗虧 上帝者之俾佐天子底定綏輯弥文以理白髮蒼顏正笏垂紳凜然秋霜照弓陽春國有老成邦家之福 天子萬年景命有僕

趙中丞畫像贊

天曆庚午孟夏初吉 聖天子以為御史中丞趙公世安元從功臣爰置左右踐敷省轄表正風憲厥績殊茂乃命繪像用肅具瞻親御翰 書勅其上識以寶爾而命臣集述贊焉

臣惟公之事 上也靖恭夙夜夷險 致入則告以謀猷之

嘉出則宣其德意之美倦 焉愛君體國之意其見於儀形風采者宜垂頌焉謹拜手而述贊曰

肅之憲綱國之司直以正朝廷百辟是式聖皇御天法度章程風霆之威日星之明昔在

世祖最重斯職 列聖授受精意慎擇賢必有能廉必有材必信必親庶尹則諧惟今趙公簡在有素既勤其躬亦衡其

慮 天子有行鞭弭素韃 天子正統襄贊周旋温 其儀侃 其色珮玉舒遲前席密勿曆階中書時清政平乃肅風

紀以贊國成知無不言言無不聽有容有嚴有文有政 天子萬年大臣相之九叙惟歌無以尚之

吳宗師畫像贊

游乎萬物之表而能約已於名教老乎朝廷之間而不濡迹

於公卿聚若華星之麗乎河漢浩然雲氣之出乎嵩衡其凝也止水之善鑑其動也祥風之特行祠黃石者蓋有遺書之託衣白衣者寧無辭當世之名導冲和以輔元化非呼吸而致長生伊者有巢父軒轅有廣成則所謂宏演博大真人者安得不後天地齊日月以贊于休明者乎

御馬五雲驥圖贊

傳曰天用莫如龍地用莫如馬夫馬上配乎龍而乾之爲象兼焉斯其爲貴者矣然周穆遊乎西極虛傳八駿之名漢武求諸渥洼實費貳師之出方于今日殆不足云我國家肇基朔方奄有六八千乘萬騎風焱電馳武功告成禮文畢備百年涵煦之久萬物生息之繁於斯盛矣乃若夫馬外則駟駟而在朝樂彼超驥內而肅々以居閑均其調習論其可以名稱者蓋不勝紀至順二年夏天子時巡上京行幸之次

日閱其良於是五雲之驥出焉蓋神駿之尤傑者也臨軒一顧廓開萬里之風雲立仗羣趨却立九重之虎豹光逾雪練文戴龍章凡其游牧之生悉備乘輿之御此豈偶然者哉於是命善工圖形藏諸內閣而俾臣贊之臣聞驥不稱其力稱其德也今斯驥也生于明時遭逢賞鑒不有其德曷克臻茲噫一馬之善上猶錄之如此豈有人材之出於當世而不見知見用者哉敢述贊曰

房宿儲精天馬來下有萬其駿莫之能侶玄文五聚黼黻厥身粲若負圖猶龍有神聖皇在御神物斯出行地乘天嘑雲耀日爰勅繪素對貌竒姿德力具稱存乎贊辭

瑞雀贊

至順三年三月趙國公臣常不蘭奚中書平章政事臣亦列赤御史中丞臣脫盈納等欽奉

皇帝聖旨皇后懿旨命特進神仙太宗師臣苗道一脩羅天
大醮于大長春宮四月朔旦臣不蘭奚自長春以青詞入謁
內廷請署 天子御名沐以龍香之澤封以雲錦之函羽葆
鼓吹導自禁籙歷于曾城浮塵不揚馳道清肅風日和美靈
光發舒將至平仙壇而臣道一率其屬奉迎道周羽蓋雜華
霧以繽紛法曲 繞旌霓而高其百官在列萬姓聚觀乃
有青鸞白鶴飛舞太空雅啖長鳴去人尋丈若羣真之並駕
從 以來迎盤桓後先及壇而止眾目瞻觀驚歎神異醮
禮告成言將復命咸曰苗君其先朝舊人老成端恪道行嚴
一故能深達皇宸致感玄徵有如此者而臣道一乃曰兩宮
至誠上與天通一念之興如響斯答天何言哉示之以事是
故玄裳縞衣羽翼乍離於三景同鳴齊唱音聲遙聞於九天
老臣奉詔禱祈庶竭愚分而已至于明應則 上帝之所必

報兩宮非老臣之所能致也然臣不蘭奚等不敢隱其事繪
圖以聞傳 旨國史臣集書以識之蓋仙人道士之言云太
上至真飛行虛無不可以形迹見也然而輟馳翔於寥廓橫
四海而覽輝則羽族有先見者焉書傳有之鳳凰來儀神祇
來格此其類也臣聞至元紀元歲在甲子實命誠明張真人
建大醮於茲宮有瑞鶴之應焉今七十年矣前太常徐瑛見
諸贊詠臣切思之至元甲子

世祖皇帝在位之五年今茲之歲則
今上皇帝之第五春也玄微之感同符

世祖不亦盛乎於乎我 聖皇敬天尊祖之誠仁民愛物之
惠前聖後聖其揆若一則吾 聖元宗社無疆之福詎可量
哉敢再拜稽首述贊曰
明之天子昭事上帝肅之在官齊聖無二乃瞻殊庭神明所

都嘉徵瑞圖此與此儲維時神師故舊耆老羽衣持節致我
忱禱綠章紫封金龍夾扶來自禁中百靈與俱倬彼雲漢有
飛者羽如雪映掩載翔載舞乃占道書是為真符聖神降臨
其來舒降休隕祉爰自昔始表而著之億千萬禩

道園學古錄卷之二十一

道園學古錄卷之二十一

應制錄二

雍虞集伯生

制誥

封宣聖夫人制

我國家博典禮以彌文本闡門以成教乃瞻素王之廟尚虛
元媿之封有其舉之斯為盛矣大成至聖文宣王妻并官氏
來嬪聖室垂裕世家遵豆出房因流風於殷禮瑟琴在御存
燕樂於魯堂功言邈若於遺聞儀範儼乎其合德作爾禕衣
之象稱其命鼎之銘噫秩之彝倫吾欲廣閔睢鵲巢之化皇
皇文治天其與河圖鳳鳥之祥可特封大成至聖文宣王夫
人主者施行

鄆安大長公主詞頭

皇家制禮恩實重於懿親帝女正儀體允隆於尊屬肆頒異

數祗協彝章，公主其慈孝，夙聞肅維，維則翟車象服，備赫奕於先朝。鳧繹龜蒙，適奠安於樂國。爰進加於長號，又增益於大名。於戲詩詠穠華，德弥崇於威曉。易占元吉，世永保於藩封。

燕帖木右丞相封太平王制

朕正祖宗之統，入續丕圖。國有社稷之臣，豈維世胄。既克戡於多難，宜超示於殊恩。具官某，沉鷲有謀，英銳無敵。我皇考昔撫軍於龍朔，而尔父寔佐命之虎臣。賜券報功，盟書啓籥。更累朝而弥顯，識大歷之攸歸。手握兵符，力扶景祚。父清宮而迎乘，猶多壘之在郊。臨陳誓師，咸服奉辭之慷慨。揮戈決戰，衆驚用武之神明。人民懷綏，輯之恩城。闕壯奠安之勢，俾兼司於將相。用修扞於邦家，韓信之輔漢。皇論定當時之攻取，子儀之在唐室。身爲天下之安危，皆眞食於王封。今

何軒於往轍，是用錫之位號。朕以土田禮冠，絕於百僚。名求垂於千載，鳴虛有非常之功。則有非常之錫，朕用獎於勲勞。建大中之業，而享太平之成。尔毋忘於眷注，丕昭至意。式克欽承。

封營都王制

緬懷故舊之恩，莫如阿保。爰致褒崇之典，俾極哀榮。國有恒規，朕無私惠。具官某，恭良而愿，慈温厚而老成。卜以負之昔，被東朝之簡用。擇其可者，並善甲觀。以扶持嗟備著於勤勞，不少留於耆艾。肆予踐阼，首錫褒封。時巡來次於近郊，秋露夕濡於宿草。願茲音典，未究深衷。廼命外廷，更申異數。於戲五等之爵，重莫過於王封。千乘之邦，親莫先於畿甸。尚其英爽，承我休嘉。

營都王夫人

纂圖撫運崇德報功追念爾勞克任保持之力至于今日其
享安榮之時天不假年禮宜異數具官某出入禁掖左右朕
躬安其賙育之柔稱爾温良之懿邦家官府共興故舊之恩
車服士田何愛便蕃之錫愛頒予渥俾相其夫於戲若昔諸
侯王有生至貴封之千乘國無憾令終

封營國公制

國之令典必兼恩義之隆時維舊勳宜錫褒崇之盛嗟其遠
矣今俾申之具官某自其幼時在朕潛邸極祿共其燥濕啓
勳與之周旋越在艱難尤有勞勩屬尋鞬而未釋傷國務之
逾深■轉以歸籌惟頓失道于續緒風雲千載之興獨不親
臣立隴九原之閔廓其封兆錫以榮名願未究於予懷乃增
疇於大邑於戲萬鍾之祿雖不及於生前兩世之封庶有勸
於天下

營國公夫人

盡瘁以仕良臣有翊衛之勤從一而終貞婦抱純誠之懿錫
以寵數光于幽潛具官某淑慎其身柔嘉維則閔殷雷之勤
而勸義守相舟之誓而靡他同穴而藏得相從于地下疏恩
以報何不逮於生前賁之簡書易其湯沐於戲哀榮被於兩
世固申勸於舊勞忠孝萃於一門亦以表夫高節

封營國王制

朕纂膺不緒聿懷舊德之臣敷歷治朝夙被先皇之眷未及
懸車之歲遽聞拱木之新爰命有司備備舊典具官韓亦剛
明而有守沉毅而善謀闕與衛於藩垣治軍實於懷存自單
懷而入定內難與贊廟謨望龍朔而奉導前驅仰承天表進
拜集賢之任旋參儲極之寮編踐清華具瞻台鼎往填南服
偶逢草棘之弄兵公使北還酒駐旌帷而披堵不遺憂於宵

斯真親體之股肱又簡朕心方將柄用廼致慈遺之誅寔深
者身艾之思賢子能忠在朕左右真王加錫首卿始終並兼封
贈之崇式表哀榮之極於乎往哉魂魄樂壯美之山河宜尔
子孫輔尊安之社稷

封寧朔王夫人

朕我大臣既極褒崇之典相其內助宜同恩數之隆俾增耀
於禱禴用齊畫於圭衮具官幹亦妻鉄理柔嘉而端肅恭儉
而和平克替其夫終始股肱之任善儀諸子服勤左右之方
身致康寧家用昌熾命錫封章之貴養宜鼎食之珍於戲維
此朔方寔尔世家之舊賢於上壽用成賢母之名

封遼陽王制

朕寅奉丕基務推茂澤廼瞻廷臣之舊昔膺柄用之榮俾率
彝章特還卹典具官昭散秉質謹愿接物寬容始緣宿衛之

勤尋守貨泉之任致身管閫蓋歷事於五朝執政廟堂嘗首
相者數載每規墮於畫一克同協於和恭均逸外藩遠將德
意宣恩東服備著輯綬凡其登進之時率在阜殷之日久奉
公於夙夜亦良稱於股肱弗永終譽遠興遠慨秋霜在野莫
追既往之悲旦日行封尚服維新之澤茲誠異數式慰遺魂
噫遠海非遥姑遂懷鄉之志子孫不隊益推報國之忠

封燕下鄉知院祖明里

我國家教孝以勸忠因近以及遠德之茂者名久而後著恩
之深者爵加而愈隆具官某原而能恭勇而知禮始逢景運
當東征西伐之殷先啓戎行有左弭右韃之助克勤乃事竟
隕厥躬顯融不及於當時勲業廼興於後裔往稽故府宜錫
嘉邦於戲古者專城重地莫逾於上谷貴諸幽壤名王遂賜
於全封爾其有知服我休命

祖母

師武臣力國家致典運之隆教以義方母子有成人之造異恩所洎豈曰徒然其官其儉以飭躬慈而逮下相其夫子每崇忠厚之風宜尔家人用啓功庸之盛是以甫及再傳之後並登一品之榮五世其昌三王並列於戲酬其爵邑欲遠舉於雲中咨尔臣工以示勸於天下用申顯命以賁幽宮

父

中興啓運則必有帷幄之舊不二之臣重祿勸功則必有茅土之封便蕃之錫具官其曩在宿衛已著勤勞王師飛渡於長江既贊先登之勇使節載臨於多壘不忘命將之忠逮其子孫相我家國至重者本兵之任至嚴者風紀之司而尔一家兼茲兩府故紀勲庸之盛以彰信任之功列以王章著之邦典於戲擁雍州之地式重師垣申泰山之盟聿昌世冑益

崇忠蓋用保休嘉

趙平章加官封制

宰輔者政之根本特疏青爵之封老成者國之著龜爰極文儒之任進登崇級增重化權具官趙某方嚴而精明果毅而詳縝卓以素韉之胄儼然韋布之風始事

世皇即拜御史多歷年所徧踐臺司闕實簡書每先幾而扶直作新風紀必正色以摧姦常依日月之光不改冰霜之操游在政府蔚為名臣嗟賢者之遽屯見予家之多難蕭望之身罹機禍幾貽咎於當時汲長孺面質深文耻獨為於君子暨于戡定嘉尔勤勞審是統宗既蹈危而奉義至其子集亦見殺以成仁方圖報之在衷屢引年而為說載念紫微之務實資黃髮之詢是用建尔上公保茲東魯可優游於館閣以勤相於國家於戲慎乃威儀赤烏具瞻於几之俾之著爰泰

山庸作於岩之尔其欽哉服我休命

封悟理間八制

粵有高僧來從西域式弘丙教爰錫嘉稱悟理間八歷世勤脩一源不昧寶月長臨於逝水慈雲隨起於祇園遠探夙智之因如指其掌廣說真如之緼實契予心紹隆佛種之傳以稱國師之號可特授智勝妙行宿慧真應國悟佑福國師

封鑑贊八制

象教之行國家所尚宜申嘉號用表高僧鑑贊八性本天成世隆佛種昔弘宣於內典蚤有譽於諸方物不累心舍奉已者二萬戶事融於理獨隱居者十餘年既徇請而一來宜具書於衆善可特授宏智正悟大辯捨持勝濟慧福國師

封蔣山寶公和尚制

朕不纂鴻圖中興景運致百靈之扶翊出庶徵之禎祥延瞻

真如尤深簡注寶公和尚現化身而濟世持應器以垂機顯密齊彰神變著聞於當日慈威互用廢休行及於千年藐在大江之南常住道林之上朕昔居潜邱恒仰寶坊萬石懸鐘表明珠而不灼四阿承雷輯多寶以新成暨余踐祚之初首致加封之敬若稽祀典宜錫贊書噫尚鑒至誠豈直朕躬之禱益弘願力俾堅兆姓之安

封張真君制

朕惟有道之君臨治貴無為而民化故先哲相承於上德而至聖不執於常名騰茲大歷之在予懷昔異人之輔世真官某倅以興運袞然來儀咨庸方篤於睿思晤對即符於神會嘉謀入告其辭如徵於著龜成功不居其志固輕於軒冕處身於至約之地毓物於泰和之中酬酢事變而先見其幾從容朝廷而不濡其迹設教獨高於衆甫傳宗最號於多賢盛

服齊明保合天人之際基命宥密替襄邦國之休遠脫屣而弗留每當寧而永既猶慮人間之爵莫廢方外之游俾極崇稱以表高致於采陟降左右想陪列聖於帝庭出入有無恒佑萬年之皇祚尚紆玄覽祗若寵章

天道教十一祖張真人制

朕慨觀古昔有懷大道之傳歷考聖神悉尚至誠之本緣名而設其教論世以嗣其宗其說之興于今茲久張某淵乎授受遠有師承結宇丹臺仍載皇人之筆奉祠黃石蓋由老父之書惟神物之猶存乃嘉名之是錫率由其舊眷渥維新噫與天下而爲公朕用敷於至意居域中而同大尔毋戮於真風

序

皇圖大訓序

皇圖大訓者前榮祿大夫中書右丞臣許師敬因其先臣

脩德爲治之事嘗進說於

世祖皇帝者而申衍之而翰林李士承前榮祿大夫知經筵事臣阿璘帖木兒奎章閣大學士光祿大夫知經筵事臣忽都魯都兒迷失潤譯以國語者也天曆二年天子始作奎章閣延問道德以熙聖孝又勅藝文監表章儒術取其書之關係於治教者以次摹印而傳之清燕之暇偶得此編以爲聖經賢傳有功於世道者既各有成書而纂言輯行會類可觀者又盡出於前代獨此編作於明時文字爾雅譯說詳明便於國人故首命刻之仍敕臣集爲之序臣聞古之人君能自得師者莫先於稽古古之人臣真知愛君者務引於當道後世豈無聰明之君而無睿哲之實者弗攷於古訓故也爲之臣者亦豈有不愛其君者然而不以阿順首意爲敬則以承奉疏節爲忠不知古事以至於此爲其君者獨何利哉今

天子以天縱之聖克尊前聞又欲羣臣遍知其說使不至徒
徇細人之愛爲具臣之事而已也於康聖心所在如天日
之昭明得是書者其可不深思於此也哉

金字藏經序

蓋聞乾剛御世必資化於坤儀月鏡涵空亦承輝於日象我
今上皇帝創建大承天護聖寺於是 皇后念紹隆於 祖
武祈輯福於 聖躬嘉惠生民俾均法施迺造金書三乘經
教一大瑤藏廣啟勝緣增崇 上志伏願光音融徹顯密圓
通五兩十風詠讚皇明之運普天率土皈依等覓之慈常住
正因永扶景祚

飲膳正要序

臣聞古之君子善脩其身者動息節宣以養生飲食衣服以
養體威儀行義以養德是故周公之制禮也天子之起居衣

服飲食各有其官皆統於冢宰蓋慎之至也

今上皇帝天縱聖明文思深遠御延閣閱圖書日莫有恒則
尊養德性以酬酢萬幾得內聖外王之道焉於是臣趙國公
字蘭奚以所領膳醫臣忽思慧所撰飲膳正要以進其言曰
昔 世祖皇帝食飲必稽於本草動靜必準乎法度是以身
躋上壽貽子孫無疆之福焉是書也是時尚醫之論著者云
噫進書者可謂能執其藝事以致其忠愛者矣而 聖心溥
博又將推以及人於是 中宮命留守臣金界奴庀工刻梓
摹印以徧賜臣下於呼推一已之安使天下之人舉安推一
已之壽使天下之人舉壽 聖天子以天地之心爲心而爲
生立命者蓋如此天曆二年 月 日謹序

承天仁惠局藥方序

欽天統聖至德誠功大文孝皇帝以聰明叡知之資臨御宇

內推一心之至仁參兩儀而中立昭宣三光調順四時播五
行之精御六氣之辨協士鈞之音通八風之化九功既叙盛
德大業至矣哉是以億兆萬姓休養生息於壽域之中而不
識不知者也而 皇上至德無外視民如傷仁厚思恕之心
恒若不及乃命隆祥使司作承天仁惠藥局俾大醫院使臣
耿某取和劑局方御藥院方張長沙傷寒論宣明論端効方
朱氏活人書嚴氏濟生方楊氏方錢氏小兒方擇其藥之適
用者分廿六門凡二百七十五方又勅中書右丞臣撒迪大
禧院使臣晃忽兒不花大司農臣張金界奴與奎章閣大學
士臣阿榮相與詳定進上命刻其書而出大承天護聖寺庫
金製藥開局以施萬民之有疾苦者十月廿二日臣金界奴
至孝士院奉宣 聖旨命臣集議而序之臣聞古者帝王之
於民也其為之衣食以生養之又為之謹禮讓治疴熯以救
扎瘞之不測此所謂先王有不忍人之心斯有不忍人之政
者也今 皇上一日萬幾而思慮之周至於仁惠局之設可
謂至且盡矣傳曰天地之大德曰生生也者所以為我
皇元億萬斯年無疆之福也哉

記

奎章閣記奉 勅撰章

大統既正海內定一迺稽古右文崇德樂道以天曆二年三
月作 奎章之閣備燕閒之居將以淵潛遐思緝熙典彙廼
置學士貢俾頌乎 祖宗之成訓毋忘乎創業之艱難而守
成之不易也又俾陳夫內聖外王之道與亡得失之故而以
自儆焉其為閣也因便殿之西廡擇高明而有容不加飾乎
采斲不重勞於土木不過啓戶牖以順清燠樹度閣以棲圖
書而已至於器玩之陳非古制作中法度者不得在列其為

處也跬步戶庭之間而清嚴邃密非有朝會祠享時巡之事
幾無一日而不御於斯於是宰輔有所奏請宥宥有所圖回
諍臣有所繩糾侍從有所獻替以次入對從容密勿蓋終日
焉而聲色狗馬不軌不物者無因而至前矣自古聖明處知
善於怡心養神而培本浚原泛應萬變而不窮者未有易乎
此者也蓋聞天有恒運日月之行不息矣地有恒勢水土之
載不匱矣人君有恒居則天地民物有所係屬而不易矣居
是閑也靜焉而天爲一動焉而天弗違庶乎有道之福以保
我子孫黎民於無窮哉四月日記

五色石屏風記

聖天子在奎章閣有獻文石者平直如砥厚不及寸其陽丹
碧光彩有雲氣人物山川屋邑之形狀自然天成非工巧所
能摹擬其陰漫理紫潤可書可鐫有 勅命臣集記諸而攻

木製匡廓植以爲屏焉臣集拜手稽首而言曰洪惟 聖天
子天縱睿知作興人文所以命臣之意豈徒欲夸瑰異於玩
賞乎臣嘗聞之昔者龍馬負圖而出於河伏羲則之以作卦
畫而前民用蓋二氣之實五行之殊蹟可見者理無不具俯
仰遠近皆有取焉况乎神物之特出者哉臣是以知天之所
以徵感於 聖心之深契者矣傳記有之女媧氏之有天下
也鍊五色石以補天或者疑焉而臣獨以爲古言奇奧蓋有
所喻五色者五行之精英補天者猶言財成其道而輔相其
宜而石者以見夫理之堅確不移者也今茲石表文而裏質
陰陽之道也華絢而象物五行之變合也出於明時近御几
格豈偶然哉箕子陳洪範九疇首叙五行中主皇極蓋以爲
五行順序則地平天成萬世永賴不然則謫見於上變動於
下矣然其要在於極之建不建而已人君者天下之主宰也

天人之際，寔在於此。是故二五之流行，而見於天者，兩陽寒燠風是也。肅又哲謀聖，則有時若之休，狂僭豫急蒙，則有恒若之咎。此感彼應，閑機之發，間不容絲，其不可揜者如此。夫石微物也，臣願因以致其察焉。則聖天子合天心之妙，以接前聖之統，成今日之治，以垂萬世之法，不亦著乎？臣集不勝惓惓之至。天曆二年十一月甲子謹記。

御史臺記

天曆元年十一月壬申，御史臺臣入見。內殿皇帝若曰：以予觀於天下之治，不有臺憲之司，布在中外，則何以肅綱紀，正風化，輔成朝廷之大政，而休息吾民者乎？昔我世祖皇帝即位之十年，始立御史臺，以摠國憲，其憂深慮遠，使吾子孫有以周防於隱微，禁制於暴著，其在斯乎！朕二復貽謀究觀法意，懼無以彰。皇祖創始之明，責任之重，其刻

石內臺，傲有位於無窮焉。丁亥，御史大夫臣伯顏等言：謹具石請刻。詔書制詔國史，汝世延汝集等，其製文係以御史大夫以下，至監察御史姓氏。臣世延自中丞行臺江南臣集承詔，再拜稽首而言曰：我皇元之始，受天命也。建旗龍漠威，令赫然。小大君長，無有遠迓。師征所加，或克或附。於是因俗以施政，任地以率賦。出其豪傑而用之，禁罔疏闊，包荒懷柔，故能以成其大制作之事。蓋有待也。

世祖皇帝聖繇天縱，神武不殺，智絀群策，取善無方。定天下而一之，乃攷帝王之道，酌古今之宜，建國紀元，而著令典焉。立官府，置郡縣，各有其職，而上下相承，內外相維，聯屬貫通，以通功成務丞相治中書，以統之上承天子，出政令於天下。較若畫一，莫敢踰焉。其或任焉而非人，令焉而非法，近焉而弗察，遠焉而弗達，交修其非，以輔其所不逮，則責諸風憲，它

官雖貴且重不得預况乎朝廷百執事郡縣小人之吏作姦
犯科爲不善者乎是故使其君子安焉以盡心使其小人懼
焉而遷善而天下之治成矣此其官所以不可一日闕與
今上皇帝以武皇之親子久勞於外入正統緒罪人斯得
功成不居克讓大位故其觀乎事變之極而知患得患失
者必至於無所不至察乎民庶之隱微知其蠹弊深刻而無
所告愬故慨然當宁興嘆而屬意於斯者豈偶然哉謹按御
史臺至元五年置秩從三品二十一年陞正二品大德十一
年陞從一品臺有大夫一人後增一人中丞二人後又增二
人隨復故侍御史二人治書侍御史二人殿中侍御史二人
治朝著之事典事二人掌幕府文書之事後改爲都事三人
後又以都事之長蒙古若色目一人爲經歷檢法二人後發
管勾三人其一人兼照磨監察御史十二人後增至十六人

皆漢人又增蒙古色目人如漢人之數今三十人至元十四
年既取宋置南行臺二十七年專蒞江南之地號江南諸道
行御史臺官秩如內臺而監察御史今二十四人西行臺初
由雲南廉訪司陞行臺大德元年移治陝西號陝西諸道行
御史臺蒞陝西甘肅四川雲南之地延祐間暫廢隨復其官
秩如南臺而監察御史今二十人至元六年初置各道提刑
按察司正三品有使副使僉事察判經歷知事二十八人改
肅政廉訪司使副使僉事各二人大司農奏罷各道勸農司
以農事歸憲司增僉事一人經歷知事照磨各一人今天下
凡二十二道始建臺時大夫則塔察兒也今六十年繼居其
官者名氏拜罷歲月則有掌故在謹記

天心水面亭記

天曆三年春臣集臣洞臣允思得侍

清閒之燕論山川形

勝臣九思曰濟南山水似江南殆或過之臣洞之居在大明湖上雍土水中而爲亭可以周覽其勝名之曰天心水面可想見其處矣於是勅臣集書其勝而記之臣集再拜稽首而言曰昔宋儒邵雍氏之詩曰月到天心處風來水面時臣洞蓋取諸此臣聞雍之爲道上達乎包羲以至於帝堯周文孔子之盛其始學也隱居百原之山仰而思之至忘寒暑如是者且二十年其制作在皇極經世其性情寓於詩程顥氏之言曰就其所至而論之可謂安且成矣噫非幾於古之所謂睿知者其孰能與於此然則臣何足以知之雖然竊嘗聞之斯二言者豈非陰陽動靜之交乎按先天圖陽盡午中而始生焉擬之爲月窟陰盡子中而復生焉擬之爲天根天根又曰天心所謂天心無改移是也以月臨天心非陰陽之互交者乎隤之爲卦陰爲主於物爲風坎之爲卦陽爲主於

物爲水以風之初而行乎水之上非動靜之始交者乎所謂一動一靜之間天地人之至妙至妙者庶於此乎可見而臣不足以言之也請以人事論之月到天心清之至也風來水面和之至也今夫月未盈則不足於東旣虧則不足於西非在天心則何以見其全體譬諸人心有絲毫物欲之蔽則無以爲清墮乎空寂則絕物又非其至也今夫水滔一汨一汨日千里趨下而不爭淖而爲淵注而爲海何意於衝突一旦有風鼓之則橫奔怒激拂性而害物則亦何取乎水也必也至平之水而遇夫方動之風其感也微其應也溥渙乎至文生焉非至和乎譬諸人心拂嬰於物則不能和流而忘返又和之過皆非其至也是以君子有感於清和之至而永歌之不足焉臣洞天資明爽應物樂易宜能有取於此請以是爲記

勅賜龍章寶閣記

今上皇帝改元元統之二年 御書閣、看雲四大字以賜特進上卿玄教大宗師吳全節受言藏之摹勒金石仍改至元之六年重鑿貞木作大閣于饒州路安仁縣雲錦山之崇文宮以度之九月一日 上自上都清暑還次懷來集賢大孝士不刺失利等以其事聞請名之曰龍章寶閣而詔臣集執筆以書臣集伏退草深懼不足以奉揚一代之盛典而明詔所臨敢不再拜稽首而謹書其事云臣聞我 國家祖宗以來德意深厚嘉惠臣民凡其報功敦族進賢使能興利恤患懷遠厚往下至一善一藝之錄慶賞德施必稱其事爵祿土田弓矢衣服車馬金玉之賜無所愛吝若夫詔告臣庶訓勅師旅贊詞弥文日盛一日無以加矣至於機務之暇親御翰墨心畫之妙成章于矢以賜臣下者則未之見也

皇上天縱聖孝發自宸衷作為此書度越前聖於戲盛哉然而宗親戚眺之近將相勳舊之家內而禁衛臺閣之臣外而雄藩巨鎮之府未嘗有所賜也而臣全節獨被異恩群臣莫及此御史中丞臣祖常太常臣玄所以欣抃舞蹈奉 詔詞頌詠嘆於無窮者也然藏副于名山嚴奉以崇構此臣全節區區之忠報稱於萬一而不能自己者也夫或謂臣曰日月運行次舍周矣

皇上君臨萬方覆幬廣矣雲錦之山邈在東南湖江之表何獨得此乎 聖明之世乎臣對曰景星麗天垂光必有所注醴泉發地流潤必有所達和順積久神明來鍾有在於是豈常情之所可測哉臣全節自其先師神德真君臣留孫事世祖皇帝為玄教之宗以清靜寧一之說贊乎 列聖重熙累洽之治者亦深遠矣臣全節嗣而傳諸其徒相為長久顧

其師弟子父母之邦相去百里而近 恩光之所被及不於此而何適哉閑者臣全節自幼至今之所自名也看雲者臣全節言將歸隱之處也 旨意之微豈不欲其在朝在野隨隱隨顯無適而不自得是以特書以遺之也乎臣又聞之明有禮樂幽有鬼神其理一也凡而繼玄教而有作者尚克清慎篤敬以率其衆毋忘 聖天子明顯之恩守土之吏觀風之使仰而觀之見龍章之在斯也他郡莫之有焉其興感嚴奉之意當何如哉川靈嶽祇凡百有神依乎上帝貴神之所治呵禁衛護毋敢厭戮則幽顯之道不亦交著於億萬斯年乎至正元年五月丙寅謹記

勅賜玉像閣記

至正元年五月臣集得集賢院文書云去年九月一日大孝士不刺失利等奏特進上卿玄教大宗師吳全節嘗蒙先

朝賜白玉之璞命工琢之儼為 太上老君說經之像刻沉水之香以為山而居之奉以歸諸龍虎山上清正一宮達觀堂之閣請名之曰玉像而 皇上寵賜閑者看雲四大宗模以文粹飾以雲龍奉而置諸其閣矣有 勅汝集其作文以記之臣集謹沐浴齋肅北望受命再拜稽首而言曰臣聞之天不可得而知也而 聖人與天為一求諸聖人則天或可得而窺矣聖人遠矣儼諸形容而象之或可得而見之也與均是人也有一人之人有十人之人有百人之人有千人之

人有萬人之人有億人之人有兆人之人以一人而當兆人之人者其惟聖人乎聖人猶天也道家之言以為聖不足以盡之又至人神人之云者極聖人之盛至於不可知者以為言也均是物也有一物之物有十物之物有百物之物有千物之物有萬物之物有億物之物有兆物之物以一物而

當兆物之物者自非天下之至剛至純至粹至精至貴至美其孰能與於此可以比德於君子之盛者其惟玉乎傳曰乾爲天又曰爲玉玉天之類也是以禮天者用之言可以通乎天也道家宗老子尊老子而謂之老君猶以爲未足而推之謂之太上焉名其所不可名而事之於天一矣玉象之休其知道者之所爲乎上古聖神以爲天之無言也而其所以無言者亦不可得而名言也則畫以示之然後日月星辰之所以運行風霆雨露之所以變化仰而觀之天之所以爲天者無不在是

今上皇帝按筆結字昭宣人文平直方圓輝光流動原乎性情之正極乎神明之妙心畫之所示不亦高朗著見矣乎求之天者觀於此而有得則於其齋明盛服之有臨睟面盎背之可象者必有不言而喻者矣以此事天豈非玄教之所以爲可宗者乎夫上清正一宮者道家之會歸而嗣漢天師張君之所治也按龍虎山志宮有堂五十以分處其徒衆達觀其一也命玄教大宗師之弟子世居之而大宗師自神德真君以來羽翼天朝柱石道教朔南相望表裏不二繼繼繩繩之傳方未艾也噫玉象之所奠天書之所臨非特一堂之榮也一宮之榮也非直一宮之榮天下四方脩老子之學者皆與有榮者矣然則斯閣也有千載之係焉故書以爲記至正元年閏五月己卯日謹記

碑銘

大元勅賜饒州路番君廟文惠觀碑銘

番君之有廟于番易久矣舊廟在郡治之廳事故宋郡守范文正公遷之城西北至國朝廷祐年郡守玉都中以其廟之久弊更新之郡人玄教大宗師吳全節作芝山道院以

主其廟故翰林學士元明善爲書其事作迎送神曲以祀神
焉郡人以廟隘弗稱所以尊敬番君者表仁慶之別業在永
平門外平衍寬阜因玄妙觀任持王仁近致諸大宗師以爲
番君廟仍作爲宮于其側以守視之仍改至元之三年自舊
廟奉番君之舊像以居仍以梅銷將軍侑食守將吏士各率
其屬庶士庶民後先奔走不約而集道迎有序至廟具少牢
醴幣大合樂以饗之民大悅明年太宗師言于朝

天子遣使者封奩香織金文之幣爲之衣以賜勅翰林院
畫旨賜文惠觀俾有司勿敢有所撓因命願神凝素文教真
人于有興及宋道冲方志遠治觀事而太常議番君當易名
曰文惠王因漢舊謚而惠者著其流澤故鄉之無窮也觀
以是得名廟有故守臣顏魯公及范公之祠郡人以其爲故萬
戶齊某世以其兵守饒亦有別祠前太守今浙省參政王都

中能治郡亦畫像而事之而施田度弟子甲乙治觀事者志
遠也六年九月朔旦

天子清暑上都還次懷來集賢大學士不剌失利等用太宗
師言新廟之宮宜勒銘有勅以命臣集臣謹按番君事見

史策世能言之漢諸侯王惟長沙最久國分而微而廟祠在
番易千數百年不絕得民心者茲是其又乎抑神明之感有
所在乎昔徐偃之得民避穆王而去之民祠之太末太末之
徐皆宗偃李唐時徐氏子孫有守其郡者太新其廟韓愈嘗
書其實焉吳泰伯世家春秋末吳益大與中國會盟季子之
賢仲尼猶稱之既無其後子孫散處蓋以國爲氏番君又以
吳氏與名最著至德之傳其不可以名稱如此哉太宗師從
其師受知

世祖皇帝事 列聖五十餘年尊榮安久卿相吳及位特進

號曰真人其大父父有

武宗皇帝之錫命若曰世祚饒國建立為公於是太宗師因
祖父之賜履遠推本於宗家再作番君之新廟極其盛大其
亦倣於徐氏之故乎臣集敢不拜手稽首奉 詔著銘以遺
之其詞曰

有具世家 於赫番君 相是有歸 克煥其群

江南之東 惟番惟大 洪源盛流 彭蠡其匯

大納有容 保和以冲 含生所資 神明來宮

額二千里 中城聽治 民之來享 出入多制

神道尚幽 人道尚明 別而理之 新宮乃成

既遷既好 歲久面弊 東門有田 萬神攸萃

自堂祖基 棟宇言二 靈之洋洋 來耳來安

顧瞻故鄉 孰非吾土 隨感有見 寧滯方所

相方慶新 在我曾孫 曾孫孫子 思著思存

道家之宮 以祀上帝 則具是依 曷其有替

文惠之褒 人無異辭 有煒裳衣 勿私尔邦

天子錫之 神之格思 食尔舊德 勿私尔邦

惠我四國 史臣脩詞 麗牲有碑 百神敬共

明詔在茲

雍 虞集 伯生

碑

武衛新建先聖廟學碑

國家初建大都廼分侍衛親軍為列衛布諸畿內武衛其一
 也至元廿六年始置營在涿州南去京師二百里凡衛必有
 營有城郭樓堞門障關禁官治行伍廬舍庫庾備甚而井
 而特立先聖孔子之廟儒學在焉衛之官有都副指揮使以
 下將帥偏裨付伯之長委積營作之署幕府文書之史而特
 設儒學教授以教士大夫子弟焉衛士以萬計自殊征行則
 有內府修繕之役歲巡幸則以精銳從其留屯於營者三之
 且其使之長率以近臣領之其官治京師中而分任屯事於
 營者使或副若貳皆三歲一更將吏亦各以番上獨教授常

在衛治教事此衛有學官之大槩也天曆二年武衛都指揮使洪灝分衛事治營中廼曰今聖天子聰明睿知文治彙興天下莫不嚮風而興起灝也世慎忠孝得備戎行少游上庠得受教於君子矣而吾衛廟學未立師弟子教學無所於在非闕典歟此誠灝之責也時亞安方為衛使之長深然其言即以建學之事上聞上可之廼以軍務之暇度地於營東南廣袤八十畝廼基乃堂于其燥剛觀泉審方作新文明經營林用石木陶冶工作程度心畫皆授具有成法明年知樞密院闢二台來代亞安見諸侍之備欣然相成之即日復以興役聞於是經始於至順辛未之三月作禮殿以奉先聖像顏子曾子子思子而子配從祀十楹分位殿中東西鄉七十二弟子繪廡下作講堂齋廡庖廡垣墉門街皆如常制凡費用一出公帑不以煩人及冬而告成是年中書平章政事

禮部海牙公以宰相兼長衛帥隆然舊臣敦詩書禮樂以佐天子之治教尤樂其有成為度營旁地得二千畝俾耕以食學者乃以廟學告成入請于上命臣集記之臣集受詔謹具其事廼再拜稽首而言曰昔我

太祖皇帝奮揚天威爰啓帝祚

世祖皇帝神武不殺遂一海內列聖相承功成治定至於

今上皇帝天下晏然兵措不用爪牙之士廼得優游弦歌於其間豈非千載之盛乎臣嘗學於孟軻氏矣其言以為未有仁而遺其親未有義而後其君者也又以為壯者暇日修其孝悌忠信則雖制挺可以勝敵蓋言人心天理之足恃也如此今學校之設其教則仁義之道也其事則孝弟忠信之行也誠使剛強武勇之士身衽金革而知學焉則仁義素明於曾中忠信不遺於平日緩急有所用焉知義利之辨得違順

之決議定志堅見危致命以親上死長則立功國家名顯後世復何疑焉然則學校之設豈小補哉敢作詩以頌之其辭曰

皇命建學制自都邑通祀先聖中外惟則周廬列藩環拱中極率是有作以造成德維時武衛載度新宮其帥有文以為已功衆勸其來有敏其功相臣冠軍曰宜有崇旣崇旣完入告天子天子曰咨我旅多士戰爾干戈安爾鞭弭俎豆游歌庶其在此侃侃將帥而及而兄勉爾孝友勛爾忠貞出奮于征歸力于耕輯睦靖恭勿愆勿爭有牲有醴歲時用享觀德于射我祀爾相端爾威儀節爾飲讓神之格思錫爾多慶崇墻言過者式之有仇其門來者則之麗牲之石史有刻蘇永念勿忘君子之思

黃錄普度大醮

功德碑

泰定二年歲次乙丑正月之吉始和皇帝燕居握清撫時康寧中心無為以守至正踐丕承之位著若有見於羹墻廼召集賢院臣而告之曰惟天惟祖宗委祉錫禧式克至于今日海嶽寧謐波塵不驚詩曰於乎皇王繼序思不忘予曷敢弗顧謬乎宗廟烝嘗之事有司具矣然而雲霧濛濛予何以見其降升天田日旋予何以識其往來有能為予事志意以通神明者乎昔在成廟受遺世皇瞻惟億極之賢克相內理然而蒼梧萍徙降靈小水遺恨徒結歲月不邁且夫本支繁茂豈無孽牙之傷雲漢昭回惜有氛祲之播觸念豪髮疾心丘山有能為予釋陰憂而滌靈爽者乎夫有天下也一體民物一視宇宙君若高樓愴予猶有慨於神明幽沈抑塞詎謂可忘於臣庶有能為予發晶耀而溥惠澤者乎皆頓首言曰聖慮淵微非臣愚所敢與知天人之間其事甚重非臣所得

專任請為丞相議之制曰可明日又奏曰道家有黃籙齋科者上可以導列聖之宸游下可以達群生於屯昧請以是昭塞旨意之萬一 皇帝若曰俞哉庶其在茲乎時則有若三十九代天師太玄輔化體仁應道大真人臣張嗣成親揚祖教妙幹道樞神仙演道大宗師森定虛白文逸明德真人臣孫復道以老成敦厚之資深符真契特進上卿太師太保崇文弘道玄德廣化真人臣吳全節以聰明特達之器參贊化機並領玄宗共承明詔以二月一日各真人率南北道士十衆即大長春宮陳大科法者七日出黃籙白簡萬通啓長夜之幽局暢好生之至德於是祠曹摠禮神之儀物制臣具冊祝之文章宣徽陳禮饌以惟共內府發金縷而弗吝指拜跪起皆西清禁沂之英奉若對揚必黃閣臣鄰之重有司咸在百辟駿奔不休哉在天之靈莫不頌歎於上溥天之澤莫

不均被於下赫々洋洋々洞々煌々一時盛典茂有加焉於是陳玄功於翰墨留芳迹於庭除禮也謹按故事昔

憲宗皇帝甲寅之歲以建國之初方事金華鋒鏑之下或致天傷廼紆皇心常有斯舉於今七十有一年矣時和歲豐民安物阜曾無昔日之虞而舉今茲之祀者何哉蓋嘗思之聖人之心常兢於方盛之時不逸豫於未央之日用能保鴻圖於永固御景福於方來者此其故與嗚呼盛矣乃頌之以詩曰

於穆聖皇宅心至神何幽不燭何枯不春百度具張群公在位曰此人事未究玄懿至人通神出陽入陰以成天工實契我心長春之宮密迹帝所極爾禱儀勿制常數飛章列符萬神並來奔走後先昭假匪私吁嗟典祀國有常制犧牲粢盛既充既旨陟降在庭孰是孔昭風馬雲車於焉會朝德音布

宣洪恩斯沛惟爾有生是錫是賚下沈九泉誰復念之今振
而興俾承生基茫、八埏同戴咸喜向陽就明萬億及赫域
中四大匪異伊同聽我詠歌以贊皇風

東嶽仁聖宮碑

延祐中故開府儀同三司上卿玄教大宗師張留孫買地於
大都齊化門外規以爲宮奉祠東嶽天齊仁聖帝

仁宗皇帝聞之給以大農之財辭不拜第降詔書護作方
鳩工而留孫歿後年今特進上卿玄教大宗師吳全節大
發累朝賜金以成其先師之志至治壬戌作大殿作大門殿
以祀大生帝前作露臺以設樂門有衛神明年作東西廡東
西廡之間特起如殿者四以奉其佐神之尊貴者列無如官
舍各有職掌皆肖人而位之築館于東以居奉祠之士總名
之曰東嶽仁聖宮泰定乙丑魯國太長公主自京師歸其食

邑之全寧道出東門有禱於大生帝出私錢鉅萬俾作神寢
象帝與其妃夫人嫫婁之容天曆建元

今上皇帝即大位遣使迎太長公主于全寧還及國門皇
后迎母于郊主禮神拜貺而後即其邸天子乃賜神寢名
曰昭德殿云宮廣深若干畝爲室若干楹高大弘麗足以久
遠歲時內廷出香幣致祭都人有禱祈咸得至焉有勅命
臣集撰文勒諸麗牲之碑其辭曰

帝奠九土辨方秩祀封嶽維五咸在天子有若岱宗望之
東郊兩雲來敷曾不崇朝有壇有宮神師攸作蒼龍青旂百
祗祗若天子神聖惠于民人瞻言度思昭德維新丹楹朱
戶納陛登陟青、五組兼幣加璧礼有舉之祗益以因即祠
不違天子之仁祖徠有原新甫有隰樂具在廷遠于來輯
庖盈大享寢陳燕詩神具樂康以惠我私春日載陽帝藉于

耜以先農人祈我穡事我觀我稼視迺知遠爾煦爾澤自我
畿甸相彼柔桑被于沃饒相彼玄鳥亦集其條穢之流水駕
言來後受弓載謂思皇宋帝出其闈闔士女車徒來尸來宗
壽天在予佑我民庶克修孝弟以養以賦以受多祉兵禔弗
驚蕃癘弗嬰熙之有生以樂治平天子萬年成功則告刻文
登封則有貞玉

大都城隍廟碑

世祖聖德神功文武皇帝至元四年歲在丁卯以正月丁未
之吉始城大都立朝廷宗廟社稷官府庫庾以居兆民辨方
正位井之有序以為孫子萬世帝王之業七年太保臣劉秉
忠大都留守臣段貞侍儀奉御臣忽都于思禮部侍郎臣趙
秉溫言大都城既成宜有明神主之請立城隍神廟上然之
命擇地建廟如其言得吉兆于城西南隅建城隍之廟設象

而祠之封曰祐聖王以道士段志祥築宮其旁世守護之自
內廷至於百官庶人水旱疾疫之禱莫不宗禮之爾來六十
有餘年國家治平民物繁阜日盛一日而神之所依亦厚矣
祀典之載所謂有其舉之而莫之敢廢者歟迺天曆二年二
月庚子 皇后遣內侍傳旨中政院臣使言于上曰城隍神
廟 世祖皇帝時所建有禱必應烜赫彰著而廟久弊弗葺
無以答神明之貺以繼 世祖之意請出內帑寶鈔五萬緡
以修 制曰可命京尹臣賈某董之太史以諏日弗協請俟
其言九月中書參知政事臣趙世安等奉勅封神曰護國保
寧佑聖王其配曰護國保寧佑聖王死至順二年二月癸亥
以前所賜為未足用增賜寶鈔十萬緡大修治之平章政事
臣阿禮海牙工部尚書臣石穆忽爾實奉詔領其事且命之
曰庀工而有餘資則以賜諸廟中給恒用於是工部率其屬

以即役土木瓦石金碧丹堊既善既足百工並作無敢不虔
未幾而告功於是有一物史臣集製文刻石以垂示無窮臣
集拜手稽首而言曰 聖上受命自天纂承大統師武臣力
著功盟府百靈相協固其宜哉 聖后輔佐聖明之成功而
一神之報亦不敢忘可以觀德可以致福可以示勸於臣矣
於戲盛哉請系以詩曰

維皇建國宅中圖大臨制萬方式表無外列雉四周壯於天
垣爰立明神以保固完司空奉詔慎擇吉土作廟坤維以祝
休嘏相維典則有社有方群黎萬姓罔敢禮讓維神孔迺有
堂有寢曰豫則康威怒斯凜歲時牲牢旨酒明粢無有小心
士女畢來 列聖清明歲行六十風氣宣通民物豐殖相爾
檐擁丹堊弗新何以安之俾佑我人 皇上至仁思保赤子
聖后念之命禱靈時天高日明風塵不驚大闢明堂給功告

成有祈有報伊古之道出財官付撤弊改撓山藻孔文既聞
既安度其王封載加彌尊神來燕喜百和萃止導天之貺為
國之祉室家祚胤福祿萬年貽及于民生養弗愆崇墉嚴
太止之固神永有依斯皇多祐

句容郡王世績碑

國家治平之業所以尊安而久固者禮樂刑政一本於朝廷
而執干戈以衛社稷於四境之外者則亦必有桓毅過人之
勇直亮不回之節以兼爪牙腹心之任而又世祖父子孫
相承一志然後可以內為天子之所信倚外為疆敵之所
懾服故勳常則有不可犯之勢遭變則建非常之功嗚呼其
所關係豈輕也哉天曆元年 皇帝撥亂反正以太平王右
丞相燕帖木兒有建謀力戰之功思其祖父之績乃敕史臣
製文紀事勒諸貞石以示不朽焉謹按欽察之先武平北折

連川按答罕山部族也後遷西北即玉黎北里之山居焉主
風剛悍其人勇而善戰有曲年者乃號其國曰欽察爲之主
而統之曲年生峻未納峻未納生亦納思

太祖皇帝征乞思火都火都奔亦納思遣使諭取之弗從及
我師西征亦納思老不能理其國歲丁酉亦納思之子孫忽
魯速蠻自歸於 太宗而 憲宗受命帥師已及其國忽魯
速蠻之子班都察舉族來歸從討蔑乞思有功

世祖皇帝西征大理南取宋其種人以強勇見信用掌劄牧
之事奉馬湏以供玉食馬湏尚黑者國人謂黑爲哈刺故別
號其人哈刺赤日見親近妻以哈納郡主之女弟納論中統
初元討阿里卜哥之亂班都察與其子土土哈皆有功班都
察卒土土哈領其父事是爲句容郡武毅王海都之叛 皇
子北平王帥諸王之師鎮 祖宗龍興之故地至元十四年

叛王脫木失列吉入寇諸部曲見掠先朝大武帳亡焉土
土哈王憤之誓請決戰三月敗其將朶兒赤延於納蘭不刺
以所掠諸部還四月只兒瓦解搆亂應昌脫木以兵應之
與我軍遇將決戰先得其斥候數十脫木懼而引去遂城
只兒瓦解六月遂失兵於朶刺河八月又敗之韓歡河得所
亡大帳還諸部之衆於北平我師北伐 詔欽察驍騎千人
以從十五年正月連失列吉踰金山擒扎忽台以獻又敗寬
赤哥等軍俘獲甚衆冬入朝召至榻前親慰勞之賜以白金
百兩金盃盤盃各一白金甕一梳十金織衣段九海東白鶻
一國家侍內宴者每宴必各有衣冠其制如一謂之只孫悉
以賜之且有詔曰 祖宗武帳非人臣所得御卿能歸之故
以與卿軍中宴諸帥則設之欽察人爲民戶及隸諸王者別
籍之戶給鈔三千貫歲給粟帛擇其材者備禁衛十九年拜

昭勇大將軍同知太僕院事明年改同知衛尉院事領羣牧司事給霸州文安縣田四百頃命哈刺赤屯田益以亡宋新附軍八百二十一年賜金虎符以河南等路蒙古軍子弟四千六百諫之又賜尚方金貂裘帽玉帶青鵝近郊田二千畝水碓一區二十二年拜鎮國上將軍樞密副使二十三年置欽察衛遂兼其親軍都指揮使聽以族人將吏備官屬六月海都兵入寇奉詔與大將朶兒魯懷禦之二十四年諸王乃顏叛於東藩陰遣使來結也不干勝刺哈王獲謀者得其情密以聞諸朝請召勝刺哈以離之他日勝刺哈為宴會邊二大將朶兒魯懷將往王曰事不可測遂不往勝刺哈計不得行未幾有詔召勝刺哈王曰此東藩之人由東道是其欲也將不可制言於比安王命之西行或言也不干將反者軍吏請奏而圖之王曰不可緩也身為先驅引大兵以前窮晝夜

之力渡秃刺河與也不干戰大敗之 世祖方親征聞詔王沿河而行盡收其餘黨以還道遇也鉄哥其軍萬騎擊走之大獲乃顏畜牧俘叛王哈兒魯等獻之康里欽察之人先隸諸叛王者悉來歸置哈刺魯萬戶府是歲王子劄兀兒奉詔從太師月兒律在軍戰於百搭山有功拜昭勇大將軍左衛親軍都指揮使武金虎符出則被堅執銳以率虎賁之士入則操刀七以事割烹執鬻杓以進連飲親幸委任已見於當時 成宗方撫軍詔以主從十一月征乃顏餘黨於哈刺誅兀達海盡降其衆二十五年也只里王為叛王火魯哈孫所攻甚急五月王從 成宗移師援之敗諸兀魯灰還至哈刺温山夜渡貴列河敗叛王哈丹之軍盡得遼左諸部置東路萬戶府以鎮之也只里有女弟塔倫遂以妻王二十六年海都犯金山抵抗海嶺 皇孫晉王帥兵禦之敵先據險我師

不利王獨以其軍陷陣入戰翼晉王出明日追騎大至王伏
兵面殿之七月 世祖親巡北邊召見王而慰之曰昔
太祖與其臣之同患難者飲班木河之水以託功今日之事
何愧昔人卿其他之海都等戰既數敗又知上親征遂引兵
去車駕還都大宴 上謂王曰朔方人來聞海都言戰者人
人如土土哈吾屬何所容身哉論功行賞先欽察之士以建
康廬饒 籍租卒為哈刺赤戶又以俘獲之戶千七百賜之
官一子以督賦而創兀兒在宿衛亦帥其軍 扈從至於和
材兀卑思之山拜昭武大將軍欽察親軍都指揮使左衛親
軍都指揮使兼太僕少卿二十八年王奏哈刺赤之軍數已
盈萬足以備用 詔賜珠帽珠衣玉帶金帶名鵲細毳練素
萬匹帥其人北獵漢塔海邊寇聞之不敢動二十九年掠地
金山虜海都之戶三千有詔進取乞思吉思明年春次欠河

永行數日盡收其眾留兵鎮之奏功拜龍虎衛上將軍賜行
樞密院印海都聞之領兵至次河又敗之擒其將孛羅察
成宗皇帝即位詔之曰邊事重其免會朝賜白金五百兩七
寶金酒器白毳帳鈔萬緡獨峯駝五冬召入朝有加賜則賜
其軍士鈔一千二百萬元貞元年春還守北邊二年秋諸王
從海都者皆來降邊民驚動王帥兵金山之玉龍海備之資
饋畢給民用不擾親導岳木忽等王以朝上解御衣以賜又
賜黃金百兩白金千五百兩鈔五萬輜輿各一大德元年拜
銀青榮祿大天上柱國同知樞密院事欽察親軍都指揮使
如故還邊二月至宣德府薨年六十一是年有詔創兀兒世
其父官領北征諸軍後亦封句容郡王王帥師踰金山攻八
隣之地八隣之南有大河曰蒼魯忽其將帖良臺阻水而軍
伐木欄岸以自庇士皆下馬跪坐以待我軍矢不能及馬不

可進王即命吹銅角舉軍大呼聲振林野坐士不知所爲爭
起就馬王麾軍畢渡湧水泊岸木柵漂散因奮師馳擊五十
里而後止盡得其人馬廬帳還次阿雷河與字伯接都之軍
相遇字伯接都者海都所遣援八隣者也阿雷之上有山甚
高字伯陣焉山高駿馬不利於下馳急麾軍渡河蹙之字伯
馬下坡多顛蹶急擊敗之追奔三十餘里字伯僅以身免二
年北邊諸王都哇徹二禿等潛師急至襲我火兒哈禿之地
火兒哈禿亦有山甚高其師來據之王選勇而能步者持挺
刃四面上奮擊盡覆其軍斂遁者無幾三年入朝 上解衣
賜之慰勞優渥拜鎮國上將軍僉樞密院事欽察親軍都指
揮使左衛親軍都指揮使太僕少卿還邊是時
武宗在潛邸領軍朔方軍事必諮於王及戰王常爲先付托
甚重四年秋畔王禿麥幹魯思等犯邊王迎敵於闊客之地

及其未陳王以其軍直搏之敵不能支逐之踰金山乃還五
年海都之兵又越金山而南止於鉄堅古山因高以自保王
以其軍馳當之既得平原地便於戰乃并力攻之敵又敗績
都哇之兵西至與大軍相撓於兀兒禿之地王又獨以其精
銳馳入其陣戈甲屢擊塵血飛濺轉旋三周所殺不可勝計
而都哇之兵幾盡 武皇親見之曰力戰未有如此者事聞
上使御史大夫禿只知樞密院事塔刺海也可扎魯火赤禿
忽魯即赤納思之地聚諸王軍將問戰勝功狀於是親王以
下至於諸軍咸以爲王功第一無異辭於是安西王與王衣
一鶻一騾二十晉王與王衣一金拖二獨峯駝四而

武皇命王尚雅忽禿楚王公主察吉兒賞以尚衣貂裘使者
以功簿奏 上出御衣遣使臨賜之詔曰邊圉事重少留鎮
之七年秋入朝 上親諭之曰自知在邊累建大功事績昭

著周飾御身以兼金猶不足以盡朕意遂賜御衣一帽一玉頂笠一盤珠金衣一履雙珠三囊黃金百兩白金五百兩鈔十萬貫鶻一拜驃騎衛上將軍樞密副使欽察親軍都指揮使左衛親軍都指揮使太僕少卿賜其親軍萬人鈔四千萬貫九年都哇察八兒明里帖木兒等諸王相聚而謀曰昔太祖艱難以成帝業奄有天下我子孫乃弗克靖以安享其成連年動兵以相殘殺是自傷 祖宗之業也今撫軍鎮邊者吾 世祖之嫡孫也吾與誰家爭哉且前與土土哈戰既累不勝今與其子創兀兒戰又無一功惟天惟祖宗意可見矣不若遣使請命罷兵通一家之好使吾士民老者得其養少者得其長傷殘疲憊者得其休息焉則亦無負 太祖之所望於子孫者矣使至上深然之於是明里帖木兒等罷兵入朝特爲置驛以通往來十年拜榮祿大夫同知

樞密院事尋拜光祿大夫知樞密院事欽察左衛指揮太僕少卿皆如故從 武皇於渾麻出之海上 成宗崩訃至入告 武皇曰殿下親 世祖之嫡孫以 先帝之命居祖宗之故地以鎮撫朔方者且十餘年矣海都納木忽見明里帖木兒自 世祖時各爲叛亂今皆來歸前後叛亡俘虜悉復其舊皆殿下之威靈也臣先父土土哈受知 世祖恩深義重臣之種人強勇精銳臣父子用之無戰不克殿下急宜歸定大業以副天下之望臣請率其衆備驂乘之士

武皇納其說即日南邁以 裕宗皇帝舊服玉花衣賜之副以玉帶一寶珠一海東白鶻一常御帳殿一服用之具咸備行至和林又賜鈔五萬貫衣段百五月達上都 武宗皇帝即位賜王尚服七寶笠一大寶珠衣一盤珠衣一黃金五百兩白金五千兩鈔二十五萬貫 先帝所御大武

帳一豹一加賜公主珍寶尤厚秋拜平章政事仍兼樞密欽
察左衛太僕還邊冬加封榮國公授銀印出制辭以命之復
有尚服衣改虎豹之賜中宮加資於公主者亦俱至焉至大
元年遣使賜金衣三十對衣千二年入朝封句容郡王賜金
印玉手印一七寶笠一珠帽一七寶帶一玉帶一七寶束帶
一黃金二百五十兩白金一千五百兩鈔一萬貫鶻四豹二
上曰世祖征大理時所御武帳及所服珠翠具之衣今以賜
卿其勿辭翌日又以世祖所乘安輿賜王上曰以卿有
足疾故賜此王叩頭泣涕固辭而言曰世祖所御之帳所
服之衣固亦非臣所敢當而乘輿尤非所宜蒙也貪寵過當
臣實不敢上顧左右曰他人不知辭此別命有司置馬轎
賜之俾得乘至殿門下仁宗在東宮有衣帽金寶之賜
太后又有加賜還邊

仁宗皇帝即位入朝賜尚服衣一襲金束帶一黃金百兩白
金千兩鈔五十萬金對衣二十金玉馬鞍一太后加賜夏
衣二十鈔一十萬擅帳一穹廬十特受光祿大夫平章政事
知樞密院事欽察親軍都指揮使左衛親軍都指揮使太僕
少卿延祐元年也先不花等諸王復叛亦忒海迷失之地王
方接戰有敵將一人以戟入陣刺王者王擗其戟揮大斧碎
其首血髓淋漓殞於馬首乘勢奮擊大破之遣使入報有尚
服之賜二年與也先不花之將也不干忽都帖木兒戰亦麥
干之地轉殺周匝追出其境鉄門關秋又敗其大軍於札亦
兒之地上聞之遣使賜勞有加四年上念王之功而憫
其老也召之命商議中書省事知樞密院事大理國進蒙牙
金飾轎即以賜王每見必賜坐上食必賜食待之以宗室
親王之禮王常曰老臣受朝廷之賜厚矣吾子孫不以死報

國可乎。至治二年薨。年六十二。臣聞古之言將者曰：謀與勇，惟王父子沈機大略，固不可測。而其軍堅悍，慄疾有所攻，戰應聲而起，神變倏忽，奮無迴顧。智者不暇慮，勇者不及舉，而已敗衄無餘矣。此其所以致勝也。而又數世之傳，一軍之士，同稟忠義而不變，同赴患難而不辭，此其成大功、享大名而膺國家之深信、異寵者歟。謹按王世家，忽魯速蠻贈推忠效順功臣、金紫光祿大夫、大司徒、柱國、句容郡王。謚剛毅。妻帖古該，句容郡王夫人。班都察贈推誠宣力保義功臣、太尉、開府儀同三司、上柱國、句容郡王。謚忠定。妻禿倫察，句容郡王夫人。土土哈贈宣忠定遠佐運功臣、太尉、開府儀同三司、句容郡王。謚武毅。妻曰太塔你札只刺真也。曰兀買八里真也。曰囊加直囊吉刺真也。曰阿八倫斡吉刺真也。曰塔倫也。也。只里王女弟也。皆封句容郡王夫人。子八人。長曰塔察兒，定

遠大將軍。北庭元帥。次曰太不花，御位下博兒赤。三曰創兀兒，四曰別里不花，武略將軍。欽察親軍千戶。五曰帖木兒不花，武德將軍。管領建康廬饒等處土土哈。并哈刺赤。計達魯花赤。六曰歡差，武略將軍。欽察親軍千戶。七曰岳里帖木兒，武德將軍。僉武衛親軍都指揮。使兼大都地田事。八曰斷古魯班，昭勇大將軍。欽察親軍都指揮。使。女五人。曰曲出伯。曰完者台。曰朶兒只。曰訥倫。曰某創兀兒之妻。察吉公主。楚王文也。曰也先帖你塔。二兒真也。曰也先忽都魯宗室也。只里女弟。曰哈刺真塔。一兒真也。子七人。長曰小雲失不花，武略將軍。欽察親軍千戶。蚤卒。次曰燕赤不花，資德大夫。大司農卿。三曰燕帖木兒，太平土答刺罕。右丞相。四曰撒敦榮祿。大夫。宣徽院使。五曰燕禿哈兒，闡遺少監。蚤卒。六曰答里。國公。七曰撥皮罕，幼卒。女四人。長曰忙哥合，適失禿兒駙

馬第太忽禿魯次曰完漢台適相哥八刺王三曰納只罕適
沙藍朶兒只王四曰月魯帖你適阿魯灰帖木兒王臣拜手
稽首而作銘曰維皇

太祖受天明命龍旗旌旆神旅用振雲雷險屯盤桓奮興
伐遠攻羣方畏德既定大業以遺孫子分地有疆羅絡森時
維支之彊宗于本根孰披則離孰固以存赫赫 世祖大集
厥成天覆日臨無往不庭顧茲臣庶嚮屬無外天未悔禍屬
近而悖擬為暴強弄兵嬉狂弗念弗懷勞我父兄我無藏怒
往正迷德維時虎臣無禦不克虎臣維何欽察世家克長克
君為國瓜牙相歎種人均勇同悍爾是爾師累百盈萬牧則
善芻飲漣孔腴衽金以居嗔箭以趨鳴箭咽咽壯士心折卷
甲齊驅千憤一咲孰為叛天子旅于盧王先伐謀隨以勦屠
勿敢寧止不虞奄至潰不暇奔况及闕死父子百戰從于宗

藩或夜或接我國永完天不與昧思禍知悔力困于外心服
于內來言來歸矢辭大同洒濯拜稽以朝

成宗王護其來徒御不驚肅二邊人同我太平桓二

武皇寶善將二定策驂乘王猷用壯紀功則隆論賞則豐

帝胄作嬪五世王封世忠世勇 列聖所使千載之傳國有

信史句容之墟接于太平今王之疆 天子所營其功非常

報亦殊特勒勳北郊昭示萬國

道園學古錄卷之一十二

Large stylized watermark or seal, possibly containing the characters 'E' and 'E'.

Vertical text in a narrow column on the right side, possibly bleed-through from the reverse side of the page. The text is faint and difficult to decipher but appears to be organized in a list or table format.

